

noient. Et pour ce qu'ils n'ont point accoustumé de se servir de cheuet, ie me seruois la nuict d'un billot de bois, ou d'une pierre sous ma teste, & au reste couché simplement sur la natte sans couuerture ny forme de couche, & en lieu tellement dur que le matin me leuant, ie me trouuois tout rompu & brisé de la teste & du corps.

Le matin, après estre esueillé, & prié un peu Dieu, ie desieunois de ce peu que nostre Sauuagesse m'auoit apporté, puis ayant pris mon cadran solaire, ie sortois de la ville en quelque lieu à l'escart pour pouuoir dire mon office en paix, & faire mes petites prieres & meditations ordinaires hors du bruit: estant || en- 212
uiron midy ou une heure, ie me rendois derechef à nostre cabane, pour disner d'un peu de Sagamité, ou de quelque citrouille cuitte; après disner ie lisois dans quelque petit liure que i'auois porté, ou bien i'escriuois, & obseruant soigneusement les mots de la langue que i'apprenois, i'en dressois des memoires que i'estudiois & repetois deuant mes Sauuages, lesquels y prenoient plaisir & m'aydoient à m'y perfectionner avec une assez bonne methode, me disant souuent, Aniel pour Gabriel, qu'ils ne pouuoient prononcer, à cause de la lettre B, qui ne se trouue point en tout leur langue, non plus que les autres lettres labiales, Asselhoüa Agnonra, & Seatonqua: Gabriel, prends ta plume & escriis, puis ils m'expliquoient au mieux qu'ils pouuoient ce que ie desirois sçauoir d'eux.

Et comme ils ne pouuoient parfois me faire entendre leurs conceptions, ils me les demonstroient